

黔南叢書

第二集第三冊

黔南叢書第二集第六種

黑

書

據粵雅堂叢書本校印

序

嘗考讀古今輿圖疆理之書所載山川之隆窪財賦之  
豐嗇與夫士馬甲兵人材風俗之備詳誠有資於治術  
矣而文采則不足及觀歷代詞人才子賦名都言井里  
擷蟲魚草木之華多宮闕城郭之盛極其偉麗矣至於  
攬景物之蕭條感變聲之衰颯亦復淒涼悲慨嚼徵含  
商然以語於治之得失民之休戚則概未之及也蓋著  
述之不能相兼如此今讀中丞蒙齋先生黔書則不然  
先生之書蓋專爲治黔者法也黔地居五溪之外於四

海之內爲荒服其稱藩翰者未三百年其地尺寸皆出  
欲求所謂平原曠墾者積數十里而不得袤丈其人自  
軍屯衛所官戶戍卒來自他方者雖曰黔人而皆能衛  
其故鄉無不自稱爲寓客其眞黔產者則皆苗僮狹佬  
之種刦掠仇殺獵悍難馴易於負固其土田物產較他  
方之瘠薄者尙不能及十之二夫以黔之地之人之不  
可倚以守也如彼其土田物產之無可利賴也如此夫  
國家亦何事於黔哉吾聞先生之言曰無黔則粵蜀之  
臂可把而滇楚之吭可扼國家數十年來亦知荒落之

壤無可供天府之藏猶且日仰濟於他省歲糜金錢而不惜者懷柔之衛固如是也然則黔治則有與之俱治者黔亂則有與之俱亂者先生以英偉之才深沈之識身處其地知之審慮之周矣故其爲書於所以致治而防亂者三致意焉衛里之險易必詳之所以謹慎伺嚴往來也山谷之糾曲者徑遂者必分別誌之所以慎封守飭固圉也夫治蠻徼者審其地利察其人情始焉必無以啓之而繼焉必有以制之慎稽其出入之門戶熟悉其黨與之離合防其阨塞絕其勾連禁其剽掠審其

器械材力之長短利鈍而善禦之所謂有以制之者也使之相安於其習俗相樂於其燕閒羣苗勿驚於擾索土司勿困於誅求所謂無以啓之者也故先生之書既重於嚴兵守土而尤重於羈縻撫綏每於前人定亂服叛之舉其不事張皇不煩兵革者必津津書之以爲前事之不忘後事之師此先生所以治黔而即可永爲治黔之法者也雖然先生之爲是書又不獨以經濟自負也蓋其英偉之才深沈之識具雄奇而擅奧博者又實爲詞人學士之宗凡黔之草木山川人材土物皆幸有

先生以發其菁英而抒其藻麗是故椎巒刻木皆可入  
王會之圖也踏月吹笙皆可作名都之賦也飛雲白水  
之瀑可以媲美於台廬也濟火關索之名可以核實於  
紀載也牡丹之花並於洛陽渥洼之產雄於冀北以及  
丹砂卉革硃硠雄黃之屬皆豔稱而悉數之使人之視  
黔以爲名邦以爲樂土慕而安之美而賦之蓋不欲使  
天末一隅爲曹鄧之無譏于季札且將如吳蜀之見賦  
於左思先生之於黔不亦思深而意長乎後之讀是書  
者旣賴以治黔而又資其餘材以考據史傳乞靈詞賦

則是書也豈獨與爾雅方言與夫稽含之狀酈元之注  
同日而語哉至於龍塲之祠記尊昔先民而不以異同  
相詆訾則尤崇獎激厲之盛心矣嘉炎來黔受其書而  
讀之不禁快然曰是書也經濟文章任人之攜取而各  
得所謂仁者見之謂之仁智者見之謂之智者也蓋著  
述之兼美者莫踰於此矣因樂爲之序以附不朽云康  
熙庚午九月浙西徐嘉炎華隱序

蒙齋說

德州田綸霞先生由撫吳徙鎮黔中自號曰蒙齋而屬

余爲之說余考易之蒙卦上艮下坎坎之陽爻爲九二其辭曰包蒙吉艮之陽爻爲上九其辭曰擊蒙利禦寇蓋九二以一陽爲內卦之主統治羣陰繫之以包有含容之義含容者非徒事於綸將以教思爲涵育者也上九以剛居上治蒙過剛繫之以擊有奮迅之意奮迅者非徒事於斷將以時行爲變革者也使徒事於綸則弛而不嚴而剛柔不可以相接徒事於斷則慘而不舒而上下不能以皆順夫子之象皆治蒙之効也然治蒙之術以教育爲本不得已而時至事起則變以革之故有

內外之分焉而序卦亦云蒙者蒙也物之穉也物穉不可不養也然則包之者居先擊之者居後義固有不可易者先生自吳來黔黔之民蓋蒙之甚者也范愚闇塞而弗率厥廸者有之桀驁而不可馴者有之先生曰吾以身處乎蒙之中而與之相習然後可以無所拒無所不容以爲之包而可無所事於擊蓋擊蒙者任才而包蒙者必先任德上之過剛誠不若二之剛中也而蒙之義全矣故先生之治黔率養之以寬而人皆革面舉而措之天下亦猶黔也然則先生殆精於蒙卦之義而乃

以蒙自命者耶若夫以養正爲聖功者註疏云懷德於  
隱使人莫能測其淺深先生則誠有之而豈余之所能  
淺窺乎或曰童蒙求我初筮告先生於此殆又有虛懷  
好問之義焉是說也亦當質之於先生浙西嘉炎又題

黔書

上卷目錄

叛建

改隸

設科

建學 疏附

定黔

苗蠻種類部落

苗俗

黔風

土官

方言

治苗

平亂

積穀

米價附

鹽價

禳火

救火

山水

牂牁江

紫池

關索嶺

葛鏡橋

鐵鎖橋

大相見坡小相見坡

白雲山

扁鈞泉

賦附

白水巖

柳院

象冢

涵碧潭

飛雲巖

雙井

碧雲洞

東山

甲秀樓

下卷目錄

人物名宦

孫文恭郭青螺  
記附

竹王

濟火

武鄉侯祠

神武祠碑

壯繆辨附

奢香

詹廣文

許長史

陽明書院

淮陰侯後

張三丰

月溪

南彝雲康保裔

黑神廟

夏國公祠

碑

水西馬烏蒙馬

革器

朱砂

賦附

硃研

雄黃

蒟醬

邛竹

石花

脆蛇

蜜筍柑

藥弩

蘆笙

葵草

凱里鉛

羊桃藤

雞縱

刺梨

蓮

紅梅丹桂

五九菊

魚

武侯錦

鹿

虎

紙

石

砂牀

斷腸草  
斷腸鳥

牡丹

紫薇

蠱毒

瘴癟

旱

土飯

竹米

芝妖

螻蟻

人通馬語馬通人語

黔士制義